



# ***Zeddel***

***10. – 13. Meerz 2014***

40 Jahr IKEA Schwiiz  
Isch doch s Besch "wos jeh hets gits"  
Unser Syjet, s isch nid zum sage  
Passt genau zu unserem Wage  
Hoch vom Norde e Wikinger Schiff  
Im Süde baut ganz ohni Schruube-Siff

Vor 40 Jahr, ganz süüferlig und ohni Kralle  
Sin die Wikinger au in d Schwiiz igfalle  
Dä blau-gääli Ries, ganz liislig und ohni Krach  
Macht sich breit in Spreitebach

Au mir seggle ane, wän luege was das isch  
Kaufe e Bett und Stiehl und e Gartetisch  
Für wenig Gäld und schön sin die Möbel au  
Uf em Heiwäg steehn mir denn nadyrlig im Stau

Mir könnes wirklich kum erwarte  
Usbreite düen mir uns im Garte  
S Zämebaue vom Tisch fyrs Znacht  
Isch lichter gseit als ebe gmacht

Scho d Beschriibig isch e Bitz dumm  
Die z verstoh, bruchsch e Studium  
50 Site in 2000 Sproche  
kunnsch bim Läse nümme noch

Denn 12 Päggli mit jewils 111 Schruube  
Eini hani scho verlore, find sie denn bim Suuge  
Grossi, Glaini, Blaui, Gääli, Dünni und denn au no Diggi  
S nägscht Mol, do kasch sicher si, mi Gartetisch dä strigg-i

Aber ohni mit dr Wimpere z zugge  
Und ohni e Drääne usezdrugge  
Gang-i ans Zämesetze vo däm Tisch  
Ha no e 1/2Stund Zyt, bis denn s Nachtässe fertig isch

Ich schraub und schraub und gib mi Bescht  
Und alles fyr mini Gartefeschtlì Gescht  
Was usekunnt glaub mir es isch e Hit  
und isch so circa und im Schnitt  
E Gebilde wo kaine weiss was es isch  
Weder Vogel no Fisch aber ganz sicher kei Tisch

Mini Gescht höggì uf em Bode und sin yberrascht  
Was e so e glaine Tinguely im Garte usmacht  
Ihr kennet mi jo, ganz Herr oder Frau der Sache  
Erklär ich mi Kunschtwärk und sinn uf Rache

I ha mi denn no umentschiede  
Und bi mit mim Tisch vom Flomi zfriede  
Nei Digge, so e Schruube-Terror  
Gits bi mir nüm, und das isch wohr

D IKEA due ich trotz allem nid vergässe  
Und gang jede Samschtig mini Haggbälleli go ässe  
Au die sehr fein und fyr wenig Gäld  
Und Närke hani au no gar emänd  
Bim Waagebau wird sichs denn wiise  
Mir dien nämlig alli Schruube striiche  
E Alaitig zum Baue gits au nid  
Do kasch jetzt mache wie de wit

Ischs nid e Pracht unser Wikinger - Schiff  
Mir Zockelischletzer häns baue halt ebe im Griff  
Psssst.....Hoffentlig hebt dä Schlappe  
Sunscht zahle -mr halt dä Buesse-Lappe

No ebbis in aigener Zeedelschriibersach  
Mechts nur erwähne i will kai Krach

Dä Reim vo  
Gseh ha und CH  
Dä isch vo mir, ich bruch en scho lang  
Und het au gha e guete Klang  
D Wärbig im TV het en mir jetzt gfulze  
Für e so e Online Bsteller- Dingsbums Schnulze